

lo hospedal, non havendo industria da viver per altra via; perchè la parte se confermerà de anno in ano; e pezo, che ve meteti a pericolo questi che romagnerà in officio e rezimento far injustitia, vender la raxon, robar il publico et esser intromessi da li syndici; e *tandem*, desfati, hanno modo de trovar danari per altra via. E che credeno trovar per questa via? Non haverano ducati 20 in 30 milia al più; perhò non consenti per questa via ve sia tolto el pan de man, con lo qual doveti viver con le vostre famie; e vene zoso.

Et el principe si levò in piedi e li rispose in questa sententia. Che 'l se meraveiava de lui, che a questo tempo dissuadeva el conseio a prender questa parte tanto necessaria, como se 'l non sapesse, nè intendesse el bisogno, nel qual è la terra per il dinaro, *maxime* hessendo stato in questa sua età de anni 64 de colejo, como savio di ordeni. Che molto ben intendeva, per haver del tutto perfeta notitia, che mai questa terra fo in tanta necessità del denaro e de tutte cosse quanto al presente; che ogni mexe vien dà a l'arzenal ducati X milia e non suplisse a maistranze e bisogni di quella caxa, vacua di ogni cossa, per tante robe sono ussite e prese, in questi do anni passadi, tra le citade, galie e nave prese da' turchi, passavolanti, bombarde *etc.*; si che la caxa è desfornida di ogni cossa necessaria. E che! Volemo aspetar che l'aqua ne vegna a la golla? Sin che podemo, signori, provedemo. Missier Zuan Antonio, vuj rendè pocha gratia a questo conseio di beneficij vi sono stà fati senza algun vostro precedente merito; chè, brusado la vostra caxa, vegnisti a suplicar in colegio ve fosse dato ducati 3000 al sal, compradi a ducati 30 el cento, et desconzasti tutte le partide di nostri merchadanti, creditori avanti che vuj a quel officio, con i qual haveti fabricado mazor palazzo che prima. Et che merito era el vostro, homo discognoscente? Che havè vu mai pagado de graveza in le vere di questa terra, che habiè caxon con bona consentia de contradir a questa parte, tanto justa et necessaria, tiradi tutti del nostro colejo per gran necessità che se trovemo, et presa in pregadi? Vui non festi mai mereantia de uno soldo, con el qual habiè dato utile a la terra, e vegni adesso a meter division in questo conseio fra nui; che semo divisi in tre qualità de gentilhomeni, poveri, mezani e richi, e che solo i poveri e mezani paga le graveze, i richi, che son grossi debitori, non son astreti a pagar; donde cavè vu questo? Tutti femo andar per una via; che tutti i debitori pagano; non se sparagna a niuno. Bastave con la vostra ballota far el vo-

stro juditio, senza vegnir a seminar discordia in questo conseio. Nui volemo che questa parte, justa e santa, habia luogo per suplir ai bisogni nostri grandi, per mantener questo stado e non esser schiavi de' turchi; e per mantegnir el stado, se 'l bisognerà, che Dio ne guarda, sofriremo desfar tutti calesi, erose, arzenti de chiese, fino la palla de San Marcho, più tosto che veder la ruina de questa terra. Volemo *etiam* saver, o signor cavi di X, donde l'è questo; che l'è stà comandà eredenza in pregadi?, che quando fo messa la parte fo dito el se feva, a fin che 'l se scuoda più facile li soldi 5 per campo, a ziò i subditi non dicano: Comenzano prima l'horo a far li officij di bando, poi nui pagaremo tal exation? Questo missier Zuan Antonio mostra haver pocha carità a questa patria e al stado. Nui vegnimo con le lacrimo intro i ochij a meter questa parte, aforzadi da la necessità, per aidarse con el nostro, fin che questa fortuna passa; fato tranquillità tutto è revochato; e perhò, signori, fè si largo juditio, che tutte le ballote sia in un bossolo, a ziò che, descendendo di conseio, si diga a tutti, la parte è presa di tutte balote *etc.* Et andò la parte: non sinceri 7, di no 347, di la parte 1088; e fu presa.

Et, perchè questa disputation fu longa e consumò tempo assai, non fo chiamato i banchi a capello, ma fo licentiado el conseio e chiamato pregadi, dove, leto alcune lettere, restete el conseio di X suso. Poi, a di 3 dito, nel conseio di X fo confinado sier Zuan Antonio Minio, in vita, in Arbe, con taia di ducati 3000; e si 'l sarà preso romper el confin sia apichado e pagi la taia; e tutto il suo stabele sia obligà a questa taia; nè possi, sotto la dita pena, dir ad alcun la caxon, perchè l'è sta confinado, hessendo obligà ogni dì a presentarse a quel retor nostro. E questo fu fato, a ziò lui non andasse dal turcho a seminar qualche mal; e fo mandato cinque dì da poi al suo confin. Erano

A di 3. Vene lettere dil zeneral, date a Nicosia, 95* e l'ultime dil Zante, di 17 dezembrio, et da Corfù dil baylo, di 19. Scrive, che in l'Arzipielago el zeneral trovò el gran maistro di Rodi, cardinal, con la sua armada, al qual feze grande honor di presenti e altro; volse meterlo di sora, e lui mai volse andar, *videlicet* et nostro zeneral non volse precieder; et dete 6 galie di le nostre et 4 di Franza a ditto cardinal. Et intese, esser naufragado la nave dil capeta di Franza sora Cerigo, et una altra nave francese di 700 bote è anegada con 300 homeni. *Item*, esso baylo scrive, come in questi zorni è stato in exercitio; perchè fo divulgato, l'armada di la Valona usi-